

## *ASO LUA, 28 ME 2024*

*Na tauaofia le Fono Aoao Faitulafono i le itula e 9:29 i le taeao e tusa ai ma le Polokalame o Fonotaga a le Palemene 2024/2025.*

Tatalo.

**FOFOGA FETALAI:** Ou te faasilasila atu ua amatalia nei Taulumaga a le Fono Aoao Faitulafono.

O le a taliuta ia i taulaumea le folauga a le fetusopolagi i leni taeao aua o lea ua tuana'i le gafoa o ata o le manino, ua li'a foi le faiva nai uluauma pei o le uluai faatufugaga na to i Finao, a o mamalu foi na apelepele pei ona faailo i tapu na sa ai le papa o le alii. Ua manu faaifo mai lagi le alofa ma le mamalu o le Ao o le Ekalesia i leni taeao fou aua ua maleifua mai i le lagi e mama ma ua alafai mai foi i tofaga malu le paia o le alofa o le tatou Maota.

Ia foi atu pea ia ma tumau atu i le Atua lona viiga e faavavau ona o Lona alofa ma Lona agalelei ua tatou toe fesilafai ai i leni taeao i le fiafia ma le manuia. O le taeao na atofa mo le toe tauaofia ai o le Palemene i ana fonotaga faaaauau. Ae o le taeao foi o le amataga o leni tausaga faa-Palemene 2024/2025.

E manatu o se laolao lelei leni e asamua ai se gagana a le Fofoga Fetalai e tau ina ia faatulima ma faafeiloai aloaia i le paia o le Fonousu tu maualuga a le atunuu. O le Maota foi ua popo ma ua atoa ai paia ma mamalu o Samoa i le afua mai le Malaetele seia paia le Faletapaau i le si'u i Sisifo. O mamalu e le tau tapueina a o sa foi ma faiga e le avea ae tumau e oo lava i le faavavau. O le a nona ia i le fatuaiga tausi a Tumua ma Pule e agatonu ai.

Ou te ofo alofa ma faatalofa atu ai i leni taeao i le paia o le Pulega Faatonu, ua tatou le faatasi ma le Afioga i le Tamaitai Palemia ona o Fonotaga faava-o-Malo o lo o i ai i atunuu mamao.

Le afio o lau Afioga i le Sui Palemia, afifio a outou Afioga i Minisita o le Kapeneta faapea foi le afifio mai o Afioga i Minisita Lagolago.

I lea talaga atoa i le afio o lau Afioga i le Taitai o le Itu Agai, afio foi le Sui Taitai aemaise o sui usufono mamalu uma o le tatou Palemene. Ua faamalo le lagi e mama, malo le soifua manuia, faamalo le usu i leni taeao fou.

E faafeiloai atu foi i le afifio mai o Ofisa Sili o Pulega o Matagaluega, Faalapotopotoga Tumaoti a le tatou Malo, e le lilo i lalo le taua o lo outou faiva alofiaa e tua atu i ai le Malo ma le Palemene. Faamalo le soifua manuia.

Samoa i lau faafofoga tapuai mai, le afio o lau Afioga i Le Ao Mamalu o le Malo ma lau Masiofo, lau Afioga i le Sui Tofia ma lou Faletua, lau Afioga i le Faamasino Sili, le Peresetene o le Faamasinoga o Fanua ma Suafa ma le mamalu o le Itutino o le Faamasinoga.

Le aufaigaluega paia o le Talalelei i so o se fatafaitaulaga, faafetai tatalo. Tainane Samoa i ou tulaga faalagia e afua mai mauga seia paia fanau iti i Samoa nei ma atunuu mamao. Ua faamalo faafetai mo talosaga molia, faamalo le tapuai ua tau manuia ai fuafuaga uma a lau Palemene, ae a lenei taeao ma lona vaa o le a sii i le tai. Malo le lagi e mama ma le soifua manuia i so o se tafa o si o tatou atunuu, ia alofagia e le Atua faiva ma tiute o lenei aso. Tapuai maia ma le manuia.

Mo le silafia e le tatou Maota ua nofoia nei le nofoaga mo tagata lautele e afioga i Ulu Aoga ma Susuga i Faiaoga ma alo ma fanau o Vasega 8 (Year 8) o Aoga Tulagalua a le Itumalo Palota o Salega 1. O le tausaga lona lua lenei o le tatou Polokalame. O le latou polokalame o lo o galulue faatasi ai ma le Ofisa o le Failautusi o le Fono Aoaofaitulafono e lagolago ai le aotauina o alo ma fanau i mataupu tau le Palemene. Ua le faatali lava le afioga i le sui usufono o le Palemene mo Salega 1 ma Faiaoga i le oo atu o polokalame faalauiloa a le Palemene, ae ua galulue lava latou i se auala e mafai ai ona fesoasoani i alo ma fanau a le Itumalo i mataupu o lo o moomia ai le fesoasoani.

O se avanoa foi e fia faafetaia ai le afioga i le sui usufono mamalu o Salega 1 ona o le tuu mai pea o lou tauau, se i tulou, e lagolago ai lea faamoemoe taua o le Palemene e pei ona taimua ai le tatou Ofisa.

E fai ai le leo o le Fofoga Fetalai ma Sui o le Palemene e matou te faatalofa atu ai ia outou Susuga i Ulu Aoga o le Aiga Faiaoga aemaise o alo ma fanau ua tatou faatasi i lenei taeao. Ia alofagia e le Atua lo outou faamoemoe i lenei aso, se taimi foi toe taliu le faigamalaga i Salafai ia folau i manu ma ia puipui le Alii i ala uma o le a uia. O le tatalo ia saga faamanuia le Atua ia te outou le fanau i le feagai ai ma sailiga manuia e ala i aoaoga. Ia faamanuia foi le Atua I a outou Susuga i Faiaoga e tusa o lo outou valaauina.

## **MALELEGA MAI LE AO O LE MALO**

*Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.*

**“TUSI mo:**

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le Maliega i le Fono Aoaofaitulafono na te iloiloaina ai le Tulafono Tau Faaofi ua faaalua i inei.

### **1. Tulafono Tau Faaofi o le Faatatauina o Tupe 2024/2025**

**TUUINA ATU** i lou nei Lima i le aso 27 Me 2024.

(Sainia): Tuimalealiifano Vaaletoa Sualauvi II  
**O LE AO O LE MALO**

## **ISI FAASILASILAGA A LE FOFOGA FETALAI**

### **SAUNOAGA O MALIU**

*Na faasilasila e le Fofoga Fetalai le tuumalo ai o nisi o tamalii sa avea ma sui usufono o le Palemene i tausaga ua mavae.*

1. *Ou te faasilasila atu i le paia o le Palemene le tuumalo ai o le Tofa TUSA Misi Tupuola i le aso 9 Aperila 2024.*

*O le Tofa TUSA Misi Tupuola na uluai ulufale mai i le Palemene i le Paeaiga Lona XV mai le tausaga e 2011 seia oo i le tausaga e 2016. O se tasi o Sui Usufono o le Palemene mo le Itumalo Faaalaalafaga o Falealili, ma o se Sui o le Vaega Faaupufai e Puipuia Aiatatau a Tagata (HRPP).*

*Sa avea o ia ma Minisita Lagolago o le Matagaluega o Galuega, Felauaiga ma Atinae Eseeese, e aofia faatasi ai ma le Pulega a le Suavai, Faalapotopotoga o le Malosi Faa-Eletise, Pulega o Uafu ma Taulaga, Pulega o Mala Vaalele, Pulega o Vaa a Samoa, Pulega o Felauaiga i le Lauelele, Pulega o Fale faapea ma Vaalele Savili.*

*Sa ia tauaveina le tofiga Taitaifono o se tasi o Komiti Faa-Palemene, le Komiti o Galuega, Felauaiga ma le Siosiomaga. Sa avea foi o ia ma Sui Usufono o le Komiti o Mataupu Tau Aoga, Saienisi, Fesootaiga ma Faamatalaga Faatekonolosi.*

2. *Ou te faasilasila atu foi le tuumalo o le Susuga Hon George Michael Lober i le aso 30 Aperila 2024.*

*O le Susuga Hon. George Lober e lua Paeaiga na avea ai ma Sui Usufono o le Palemene. Na uluai filifilia mai o se tasi o Sui Usufono o le Palemene mo le Au Palota Taitoatasi i le Paeaiga Lona VII mai le tausaga e 1979 seia oo i le tausaga 1982 ma le Paeaiga Lona IX mai le tausaga e 1985 seia oo atu i le tausaga e 1988.*

*Sa avea o ia o se Sui Usufono i nisi o Komiti Faa-Palemene e aofia ai le Komiti o Faamatalaga o Tupe a le Malo ma le Komiti o Tulafono Tumau i le Paeaiga Lona VII.*

*O le Paeaiga Lona IX na avea ai o ia ma Minisita o Faamasinoga ma Leipa.*

E avea ai lenei avanoa taua, e fai ai le leo o le Fofoga Fetalai ma Sui o le Palemene e momoli atu ai faamaisega ma faamafanafanaga i afioga i faletua faapea nofo a alo o afoaga aemaise foi o itumalo ona o mafutaga motusia ma afioga i sui usufono mamalu ua valaau i ai le Atua e ala i le malaga a le maliu ma le oti.

Ou te talosaga atu ai ma le faaaloalo i le paia o le Palemene, ina ia o tatou tulai faatasi ma au mo se minute se tasi, e faaalua ai lo tatou faaaloalo i afioga i sui usufono mamalu ua tuumalo.

*Na faaalua le agaga faaaloalo o le Maota i sui usufono ua tuumalo e ala i le tutulai mo se minute se tasi, a o saunia e le Fofoga Fetalai se tatalo.*

## **TUUINA ATU O PEPA**

*Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).*

1. P.P.2024/2025 Nu.2, Lipoti Faaletausaga a le Faalapotopotoga Malo Faa-Eletise mo le Tausaga Faaletupe 2022/2023;
2. P.P.2024/2025 Nu.3, Lipoti Faaletausaga o le Pulega o Uafu ma Taulaga mo le Tausaga Faaletupe 2022/2023;
3. P.P.2024/2025 Nu.4, Lipoti Faaletausaga a le Faaputugatupe Teu Faafaigaluega o Mavaega Tausi a Samoa mo le Tausaga Faaletupe 2022/2023;
4. P.P.2024/2025 Nu.5, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe 2022/2023;
5. P.P.2024/2025 Nu.6, Lipoti Faaletausaga a le Matagaluega o Punaoa Faalenatura ma le Siosiomaga mo le Tausaga Faaletupe 2020/2021;
6. P.P.2024/2025 Nu.7, Lipoti Faaletausaga a le Matagaluega o le Palemia ma le Kapeneta mo le Tausaga Faaletupe 2022/2023;
7. P.P.2024/2025 Nu.8, Lipoti Faaletausaga a le Faalapotopotoga o Inisiua Tau Soifua a Samoa mo le Tausaga Faaletupe 2022/2023;
8. P.P.2024/2025 Nu.9, Lipoti Faaletausaga a le Ofisa o le Pule Faatonu mo le Tausaga Faaletupe 2021/2022;
9. P.P.2024/2025 Nu.10, Lipoti Faaletausaga a le Faalapotopotoga o Vaa a Samoa mo le Tausaga Faaletupe 2022/2023;
10. P.P.2024/2025 Nu.11, Tali a le Malo i le P.P.2022/2023, Nu.92 Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.75 & P.P.2021/2022 Nu.19,

- Lipoti Faaletausaga a le Ofisa Tausi Mavaega mo Tausaga Faaletupe 2019/2020 & 2020/2021;
11. P.P.2024/2025 Nu.12, Tali a le Malo i le P.P.2023/2024 Nu.88, Lipoti a le Komiti o le Vaega Tau le Va Fealoai i le P.P.2023/2024 Nu.45, Lipoti Faaletausaga a le Pulega o Faailoga ma Tusipasi Tauloa a Samoa mo le Tausaga Faaletupe 2021/2022;
  12. P.P.2024/2025 Nu.13, Tali a le Malo i le P.P.2023/2024 Nu.112, Lipoti a le Komiti o Tupe Maua ma Tupe Totogi i le P.P.2023/2024 Nu.47, Lipoti Faaletausaga a le Faalapotopotoga o Mea Tau Fale a Samoa mo le Tausaga Faaletupe 2021/2022;
  13. P.P.2024/2025 Nu.14, Tali a le Malo i le P.P.2023/2024 Nu.93, Lipoti a le Komiti o le Vaega o Atina Eseeese i le P.P.2022/2023 Nu.165, Lipoti Faaletausaga a le Pulega o le Suavai a Samoa mo le Tausaga Faaletupe 2021/2022;
  14. P.P. 2024/2025 Nu.15, Tali a le Malo i le P.P.2022/2023 Nu.148, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.70, Lipoti Faaletausaga a le Ofisa o le Komesina o Sulufaiga mo le Tausaga Faaletupe 2021/2022;
  15. P.P.2024/2025 Nu.16, Tali a le Malo i le P.P.2023/2024 Nu.55, Lipoti a le Komiti o le Vaega Tau le Tamaoiga i le P.P.2023/2024 Nu.15, Lipoti Faaletausaga a le Faalapotopotoga o Eleele Tumaoti a Samoa mo le Tausaga Faaletupe 2021/2022;
  16. P.P.2024/2025 Nu.17, Tali a le Malo i le P.P.2022/2023 Nu.99, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.134 & P.P.2021/2022 Nu.60, Lipoti Faaletausaga a le Ofisa o le Komisi o Faiga Palota mo Tausaga Faaletupe 2019/2020 & 2020/2021;
  17. P.P.2024/2025 Nu.18, Tali a le Malo i le P.P.2023/2024 Nu.150, Lipoti a le Komiti o Tupe Maua ma Tupe Totogi i le P.P.2023/2024 Nu.104, Lipoti Faaletausaga a le Falemeli o Samoa mo le Tausaga Faaletupe 2022/2023;
  18. P.P.2024/2025 Nu.19, Tali a le Malo i le P.P.2022/2023 Nu.122, Lipoti a le Komiti o le Vaega o Atinae Eseeese i le P.P.2021/2022 Nu.6, Faamatalaga o Sini Autu a le Auaunaga o Vaa a Samoa mo le vaitaimi 2021-2024;
  19. P.P.2024/2025 Nu.20, Tali a le Malo i le P.P.2023/2024 Nu.126, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.48 & P.P.2023/2024 Nu.105, Lipoti Faaletausaga a le Ofisa Tausi Mavaega mo Tausaga Faaletupe 2021/2022 & 2022/2023;
  20. P.P.2024/2025 Nu.21, Tali a le Malo i le P.P.2023/2024 Nu.50, Lipoti a le Komiti o Tupe Maua ma Tupe Totogi i le P.P.2023/2024 Nu.10, Lipoti Faaletausaga a le Matagaluega o Galuega Tau Alamanuia ma Atinae a le Malo mo le Tausaga Faaletupe 2021/2022;
  21. P.P.2024/2025 Nu.22, Tali a le Malo i le P.P. 2023/2024 Nu.30, Lipoti a le Komiti o le Vaega Tau le Tamaoiga i le P.P.2022/2023 Nu.168, Lipoti

- Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2021/2022;
22. P.P.2024/2025 Nu.23, Tali a le Malo i le P.P.2023/2024 Nu.133, Lipoti a le Komiti o le Vaega o Atinae Eeseese i le P.P.2023/2024 Nu.107, Lipoti Faaletausaga a le Auaunaga o Vaa a Samoa mo le Tausaga Faaletupe 2022/2023;
  23. P.P.2024/2025 Nu.24, Tali a le Malo i le P.P.2023/2024 Nu.137, Lipoti a le Komiti o le Vaega Tau le Va Fealoai i le P.P.2023/2024 Nu.67, Lipoti Faaletausaga a le Iunivesite Aoao o Samoa mo le Tausaga Faaletupe 2022/2023;
  24. P.P.2024/2025 Nu.25, Tali a le Malo i le P.P.2023/2024 Nu.141, Lipoti a le Komiti o le Vaega Tau le Va Fealoai i le P.P.2023/2024 Nu.68, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2022/2023;
  25. P.P.2024/2025 Nu.26, Tali a le Malo i le P.P.2023/2024 Nu.151, Lipoti a le Komiti o Tupe Maua ma Tupe Totogi i le P.P.2023/2024 Nu.114, Lipoti Faaletausaga a le Faaletupe o le Atinae o Samoa mo le Tausaga Faaletupe 2022/2023;
  26. P.P.2024/2025 Nu.27, Tali a le Malo i le P.P.2023/2024 Nu.72, Lipoti a le Komiti o Tupe Maua ma Tupe Totogi i le P.P.2022/2023 Nu.72, Lipoti Faaletausaga a le Pulega o Tupe Faava-o-Malo a Samoa mo le Tausaga Faaletupe 2022/2023;
  27. P.P.2024/2025 Nu.29, Lipoti Faaletausaga a le Ofisa o le Komesina o Sulufaiga mo le Tausaga Faaletupe 2022/2023.

Ma le faaaloalo lau Afioga.

## **TUUIA ATU O LIPOTI A KOMITI FAA-PALEMENE**

*Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).*

1. P.P.2024/2025 Nu.28, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.121, Lipoti Faaletausaga a le Ofisa o le Failautusi o le Fono Aoao Faitulafono mo le Tausaga Faaletupe 2022/2023;
2. P.P.2024/2025 Nu.30, Lipoti a le Komiti o Tupe Maua ma Tupe Totogi i le P.P.2023/2024 Nu.115, Lipoti Faaletausaga a le Matagaluega o Galuega Tau Alamanuia ma Atinae a le Malo mo le Tausaga Faaletupe 2022/2023;
3. P.P.2024/2025 Nu.31, Lipoti a le Komiti o Tupe Maua ma Tupe Totogi i le P.P.2023/2024 Nu.116, Lipoti Faaletausaga a le Faaletupe Tutotonu Samoa mo le Tausaga Faaletupe 2022/2023;

4. P.P.2024/2025 Nu.32, Lipoti a le Komiti o le Vaega Tau le Tamaoaiga i le P.P.2023/2024 Nu.120, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2022/2023;
5. P.P.2024/2025 Nu.33, Lipoti a le Komiti o le Vaega Tau le Tamaoaiga i le P.P.2023/2024 Nu.153, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe 2021/2022;
6. P.P.2024/2025 Nu.34, Lipoti a le Komiti o Tupe Maua ma Tupe Totogi i le P.P.2023/2024 Nu.145, Lipoti Faaletausaga a le Faaputugatupe o Faamanuiaga mo Tagatanuu Matutua o Samoa mo le Tausaga Faaletupe 2022/2023.

Ma le faaaloalo lau Afioga.

## **LAFO A LE TAITAI O LE MAOTA E TUSA AI MA LE TULAFONO TUMAU 47**

**FOFOGA FETALAI:** Ou te tapa lau Afioga i le Sui Palemia.

**Afioga Hon TUALA TEVAGA IOSEFO PONIFASIO (Sui Palemia):** Ou te faatalofa atu i lau Afioga i le Fofoga Fetalai i lenei taeao, aemaise foi o le Fono Aoaofaitulafono a le Malo o Samoa, i le afifio atu o Minisita, Minisita Lagolago. Afio foi lau Afioga i le Taitai o le Itu Agai ma le Sui Taitai, Ofisa Sili o Pulega o le tatou Malo aemaise foi Taitai Aoga ma le fanau ua mafai ona tatou faatasi mai i lenei taeao.

Lau Afioga i le Fofoga Fetalai, ou te fia faatu le lafo, *Ina ia tusa ai ma Tulafono Tumau 47, ia faaauau mai Galuega Tuua a le Fono Aoaofaitulafono mai le Tauaofiaga 2023/2024 i le Tauaofiaga lenei 2024/2025 e pei ona tusia i le Pepa Faaopoopo o Galuega 2024/2025 Nu.1.*

Ma le faaaloalo.

*Faaluaina e le Minisita mo Faatoaga ma Faigafaiva ma le Minisita mo Galuega, Felauaiga ma Atinae Eeseese.*

*Na faamaonia le lafo.*

## **TULAFONO TAU FAAOFI O LE FAATATAUINA O TUPE 2024/2025 – faitauga muamua**

**FOFOGA FETALAI:** Tulai mai lau Afioga i le Minisita o Tupe.

**Afioga Hon LAUTIMUIA UELESE VAAI (Minisita o Tupe):** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2024/2025 i lona faitauga muamua.*

*Faaluaina e le Minisita mo Faatoaga ma Faigafaiva, Minisita mo Galuega, Felauaiga ma Atinae Eseese ma le Minisita mo Punaoa Faalenatura ma le Siosiomaga.*

*Na faamaonia le lafo.*

**TALA FAATATAU AUTU O TUPE 2024/2025  
- faataatia i luga o le Laulau-a-Fono.**

*Na faataatia i luga o le Laulau-a-Fono e le Minisita o Tupe, Afioga Hon Lautimui Ueese Vaai le Tala Faatatau Autu o Tupe 2024/2025 e tusa ai ma Tulafono Tumau 132(1).*

**TULAFONO TAU FAAOFI O LE FAATATAUINA O TUPE 2024/2025  
– lafo mo le faitauga faalua**

**FOFOGA FETALAI:** Tulai mai lau Afioga i le Minisita o Tupe.

**Afioga Hon LAUTIMUIA UELESE VAAI:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2024/2025 i lona faitauga faalua.*

*Faaluaina e le Minisita mo Faatoaga ma Faigafaiva, Minisita mo Galuega, Felauaiga ma Atinae Eseese, Minisita mo Punaoa Faalenatura ma le Siosiomaga ma le Minisita mo Taaloga ma Alagaoa mo le Fiafia o Tagata.*

**FOFOGA FETALAI:** Tulai mai lau Afioga i le Minisita o Tupe mo lau Saunoaga o le Tala Faatatau Autu o Tupe 2024/2025.

**SAUNOAGA O LE TALA FA'ATATAU AUTŪ O LE TUPE 2024/2025  
“Ia Fa’amausalī ma Fa’auau Ta’iala  
Gafataulimaina mo le Manuia Lautele”**

**Afioga Hon LAUTIMUIA UELESE VAAI:** Lau Afioga i le Fofoga Fetalai, ou te tulai foi ma le agaga faaaloalo tele i le tulaga o e’e e solituina le paia maualuga o le malutaue’e o le Palemene a Samoa i lenei taeao. E muai piimama foi e aufaatasi se lagona ma se manatu i le taulaga siitia i le taeao ua sola pei



ona saunoa i ai lau Afioga i le Fofoga Fetalai e sula le alofa ma le agalelei o le Atua i le momoli mai o so outou soifua ma so matou ola ua feiloai ai ma le manuia le Fonousu a Samoa i lenei taeao i lana Palemene. E ofo alofa ma faatalofa atu ai i lau Afioga i le Fofoga Fetalai. Afio foi lau Afioga i le Sui Palemia, afifio a outou Afioga i alii ma tamaitai Minisita o le Kapeneta, Sui Fofoga Fetalai ma Minisita Lagolago.

I lea foi itu o le malu i le afio o lau Afioga i le Taitai o le Itu Agai, Sui Taitai, ma sui usufono mamalu uma o lea itu o le malu, le mamalu o le Palemene o lo o agaia le tatou Malo. Se tapuaiga mau foi i le Afioga i Le Ao Mamalu o le tatou Malo Tutoatasi ma lau Masiofo, Sui o le Fono a Sui Tofia ma lou Faletua, Faamasino Sili ma le Vaega o Faamasinoga.

E faapea foi lau Afioga i le Failautusi o le Ofisa o le Fono tainane le saofaiga mamalu a Ofisa Sili o Pulega o Matagaluega, Faalapotopotoga ma Kamupani a le tatou Malo.

E le faagaloina le taputapu ai faafogafoga mai a si o tatou atunuu pele o Samoa i le tapuaiga tatalo a auauna a le Atua, Taitai o Ekalesia aemaise le loaloa o le aufaigaluega tofofi i fatafaitaulaga e fia o nonomanu aua se manuia o Samoa mo a taeao. Le tapuaiga a Samoa i ona tafa e fia, i ona tulaga faalupea masani, i ona mauga tetele seia paia tuloto e oo lava i mauga iti.

E le faagaloina foi le tapuaiga a nai o tatou uso, nai o tatou aiga i le Motu i Sasae, aua le tapuaiga a Tutuila ma Manua.

E le faagaloina foi le tapuaiga a si ou itumalo i Vaimauga 3, i ona itu tetele ma ona tulaga faalupe, faamalo tatalo, faafetai tapuai, faamalo le lagisoifua manuia. Tapuai maia se i taumafai se vaivai e folasia le Tala Faatatau Autu o Tupe ua taoto nei i le Maota Fono.

Lau Afioga i le Fofoga Fetalai, o le Tala Faatatau Autu o le Tupe 2024/2025 ua faaulutalaina pe faaautuina e faapea; ***“Ia Fa’amausalī ma Fa’auau Ta’iala Gafataulimaina mo le Manuia Lautele.”***

### **Lau Afioga i le Fofoga Fetalai,**

E tusa ai ma le Tulafono Tumau 131, e ia te a’u le ava tele e fai ai ma sui o le Malo, ou te tu’uina atu ai i luma o le Laulau-a-Fono a le Palemene, le Tala Fa’atatau Autū o le Tupe 2024/2025.

## **1. TAUNUUGA O LE TAMAOAIGA**

### **Lau Afioga i le Fofoga Fetalai ma le mamalu o lenei Palemene,**

O le tatou Ta’iala Mo le Lumana’i Manuia o Samoa 2021/22 – 2025/26 o lo’o folasia ai fuafuaga aua le uuna’ia o nu’u ma afio’aga, fausia ati’ina’e mausali ma fa’ama’ite le fa’atupula’ia o le tamaoaiga. Ona o lea ua tatou savalia le tausaga lona tolu talu ona fa’atino le tatou Ta’iala, e ao ona ou ‘oto’oto atu nisi o fa’atinoga ua mae’a aemaise foi o ati’ina a’e o lo’o fa’agasolo i le taimi nei.

O le galulue so’oso’otau’au o tagatanu’u uma o Samoa, ua mafai ai ona fa’atino nisi faiga fa’avae ma polokalame aua le si’itia o agafeso’ota’i (soifuaga lautele) ma le tamaoaiga fa’apea le soifua manuia o tatou nu’u ma afio’aga.

O nisi nei o fa'aילוilo ua fa'atino i lalo o le **Ta'iala Autu Muamua:**  
**“Fa'aleleia le Atina'ega o le Soifuaga Lautele”**

- O lo'o fa'aauau pea e le tatou Malo ona fa'alauitele atu fesoasoani mo le soifua manuia lautele e pei o le polokalame mo le Fa'aleleia o Apitaga mo e limavaivai o lo'o fa'atinoina e le ADRA, fesoasoani tupe mo maota o tagata matutua i Mapuifagalele ma Mapuipulotu, Fa'amanuiaga mo i latou o lo'o i ai Mana'oga Tumau o le soifua, fesoasoani mo Fa'alapotopotoga Tuma'oti, fa'apea polokalame fa'alauiloa mo galuega fa'amatata 'ese'ese ma galuega fa'avaitaimi.
- O lo'o fa'aauau pea le faigapaaga a le Malo ma ana Pa'aga mo le Ati'ina'e i le fa'atinoina o galuega fesoasoani e foia ai mataupu tau sauaga i totonu o aiga aemaise mo aiga lē tagolima. O nei polokalame e aofia ai le Malu i Fale ma le fa'amamaluina o le 16 aso e tete'e atu ai i sauaga, Vaiaso o Tupulaga, Aso fa'apitoa mo le lalolagi mo tama'ita'i, fa'apea le Aso Sa Fa'apitoa mo Tinā ma le Aso Sa Fa'apitoa mo Tamā.
- Ina ia gafatia ma si'itia le tulaga o aoaoga mo alo ma fanau, ua fa'atumauiina le fesoasoani a le Malo mo aoga amata, aoga tulaga lua ma kolisi i le \$18 miliona tala. I lalo o le polokalame mo Ati'ina'e o Itumalo, e 35 itumalo o lo'o fa'atinoina ni polokalame fa'asikolasipi mo a latou fanau aoga, e fesoasoani ai i le uunaia o a'oa'oga fa'agasolo atu i Iunivesite ma isi a'oa'oga fa'aauau. Ua si'itia foi avanoa sikolasipi mo Fiti ma Niu Sila e fa'atupeina lava e le Malo.
- Ua fa'amauiina foi le si'itia o le numera o faiaoga mo aoga tulaga lua ua maea ma ua maua o latou tusipasi poo fa'ailoga maualuluga, lea ua siitia mai le 44% i le 2021, i le 47% i le 2022, ma ua agai atu i le 50% i le 2023. E fa'apena foi ona si'itia le numera o faiaoga mo kolisi maualuluga ua maea ma maua o latou faailoga maualuluga, ua siitia mai le 63% i le 2021 i le 68% i le 2023.
- Mai le iva o falema'i fa'aitumalo, e fitu ua maea ona i ai tagata faigaluega e i ai tomā eseese fa'asoifua maloloina, ina ia si'itia ai le auaunaga tau soifua maloloina lautele. O lo'o fa'agasolo foi galuega fa'aleleia mo falema'i fa'aitumalo ma apitaga mo foma'i ma tausisoifua.
- Ua fa'amauiina foi i le fa'atinoga ole \$51 miliona tala muamua mo Ati'ina'e a Itumalo i le tausaga faa-le-tupe 2022/2023, e 16.4% sa fa'aaluina mo polokalame tau a'oa'oga, ae 6.3% sa fa'aaogaina mo polokalame tau soifua maloloina.

### **Lau Afioga i le Fofoga Fetalai,**

O le **Ta'iala Autu Lona Lua**, “**Faalauteleina o le Tamaoaiga ma Gafataulimaina,**” o lo’o fa’auau ai pea le tulimata’i e le Malo, o avanoa mo ati’ina’e aua le si’itia o le tamaoaiga. O nisi nei o fa’atinoga fa’agasolo mo le silafia e lenei Palemene:

- O lo’o fa’auau pea galuega ati’ina’e mo le vaega ma’oti o Tagata Tafafao Maimoa mai Fafu i le tulaga o mata’aga aemaise o talatu’u i nuu ma afioaga. Ua fa’amauiina ai ni mata’aga toe fa’aleleia e aofia ai talatu’u o Palauli (Palauli Heritage Trail), mata’aga fa’alenatura i Masamasa (Masamasa National Park Trails and Lookout), fa’apea le mata’aga mo i’a sā (laumei) i Sato’alepai.
- O lo’o fa’auau pea le faigāpa’aga mo le lavatia o le fofoga taumafa, i itumalo ma le Matagaluega o Fa’atoaga ma Faigafaiva e ala atu i le polokalame o le Ulua’i Seleselega. Ua fa’amauiina foi i le fa’atinoga o le \$51 miliona tala muamua i le tausaga faale-tupe 2022/2023, le 53.4% o ati’ina’e o lo’o patino i fa’atoaga, lafumanu ma faigāfaiva.
- O le fesoasoani fa’auau a le Malo mo Pisinisi Tuma’oti sa auala atu i le Ofisa Tutotonu o Pisinisi (Samoa Business Hub) talu mai le tausaga faale-tupe 2022/2023 ua atoa le \$6.0 miliona tala, ma sa fa’amanuiaina ai pisinisi laiti e 951. E fa’apea foi le \$8.0 miliona tala mo nonōgātupe e mamā tului, sa auala atu i le Faletupe mo Ati’ina’e a Samoa, lea sa agava’a ai pisinisi eseese e 80.
- O a tatou galuega fa’avaitaimi mo Ausetalia ma Niu Sila ua fa’amauiina le siitia o le fuainumera mai le 5,634 i le tausaga faale-tupe 2021/2022, i le 6,736 mo le tausaga faale-tupe 2022/2023. E le gata i lea, ua fa’amauiina foi i le 1,222 le fuainumera o i latou o lo’o galulue i le kamupani o le Star Kist i Amerika Samoa. I le maea ai o le fonotaga o le Samoa Atoa ia Me 2024, ua fa’amauiina mai ai nisi avanoa faigaluega e 500.
- Ua fa’amaonia foi e le Malo le Faiga Faavae mo le Resitalaina o Nonōgātupe Uma, aua lava taumafaiga e fa’aitiitia tulaga maaleale o e nono ai, si’itia avanoa mo nonōgātupe, ma le uunaia ai o tulaga mautū mo vaega tau tupe.

Mo le **Ta'iala Autu Tolu**: “**Saogalemu ma le Fa’atuatuaina o Pulega Lelei,**” o nisi nei o fa’atinoga ua fa’ataunu’uina mo le silafia e le Palemene mamalu:

- Ua maea pasia le Faiga fa'avae mo Vaega tau Puipuiga Lautele 2024 ina ia uunaia ma fa'amalosia puipuiga tau le soifua, siosiomaga, o punaoa, tulaga tau solitulafono faava-o-Malo, fa'apea le fa'aaogaina o upega tafailagi.
- O lea ua tauaaoina e le Malo le Vaa Leoleo o le Nafanua III, aua le puipuia o le gataifale ma ogāsami o Samoa, fa'apea le fesoasoani mo fa'alavelave faafuasei.
- Mo le vaega tau Pulega Lelei, e 22 Matagaluega ma Fa'alapotopotoga a le Malo e i ai Vaega galulue e Su'eina Fa'alotoifale Tusi, ua maea ona tapena a latou Tusi Tomua, aua le mata'ituina lelei o le fa'aaogaina o tupe faapea aseta a le Malo.

O le **Taiala Autu Fa, “Siosiomaga Malupuipua ma Suiga o le Tau,”** o lo o i ai le fa'ataua i le saogalēmū ma le mausalī o le si'osi'omaga. O nisi ia o fa'atinoga taua ua maea:

- Sa fa'alauiloa le Fuafuaga Mamao mo le Vaega Ma'oti o Malosiaga 2023/24 - 2027/28 ia Tesema 2023, ma o lo'o au'ili'ili ai sini autu mo ati'ina'e tau malosia'aga fa'afouina, uunaia le fa'aaogaina o mea-a-fale e laitiiti le eletise e fa'aaoga ai, fa'apea le taumafai e fa'aitiitia le fa'aaogaina o suau'u gaosi.
- O lea fo'i ua faamanuiaina Samoa i le polokalame fa'aitulagi mo le Vaega o Fela'uaiga i auala, e ausia ai Ta'iala e Tali atu ai i Suiga o le Tau (Climate Action Pathways for Island Transport). O lenei polokalame e fesoasoani e tu'uitiitia o kasa oona e ala i ni taavale e alu i le eletise ua tu'uina mai mo le Malo, fa'apea masini e fa'aola ai. E 19 taavale eletise muamua ua fa'apea ona taunuu mai i lalo o lenei polokalame ma o lo'o talia le 60 o lo'o faamoemoe e fesoasoani i le Taligamalo mo le Fono a Ta'ita'i o Malo o le Taupulega.
- Ua fa'amauiaina foi le si'itia o le mulimulitaia o aiaiga tau i saogalemu mo le malupuipua o le si'osi'omaga e auaunaga tau pamu penisini, mai le 70 pasene ile 2022, i le 92 pasene i le 2023. Ua fa'atupula'ia foi le numera o pamu penisini i Samoa, mai i le 24 i le tausaga 2022 i le 27 i le tausaga 2023 e aofia ai ma le pamu penisini a le Malo i Tuana'imato. O nei auaunaga lau Afioga i le Fofoga Fetalai ua fa'afaigofie ai femalaga'aiga a le mamalu o le atunuu.
- Ua fa'alautele foi fa'asao mo le puipuiga o le gataifale mai le 6,509 heta i le tausaga e 2022, i le 11,373 heta i le tausaga e 2023, ma ua atagia ai le fa'amuamua a le Malo i le fa'asaoina o le aloalo.

- I le tulaga o Vaega Ma'oti o le Tamaoiga, ua si'itia mai le 8 sa ausia i le tausaga 2022 i le 10% ua fa'amauina i le tausaga 2023, Fuafuaga Mamao ua fa'atulaga ai i totonu ta'iala mo le tali atu i fa'alavelave fa'ale-natura ma fa'afuasei.

Lau Afioga i le Fofoga Fetalai, o le **Taiala Autu Lima, "Tulaga i Galuega a le Malo ma Atiina'e Tetele,"** o lo'o fa'atino ai e le Malo fuafuaga alualu mamao mo galuega ma atiina'e e fa'amautuina ai le soifuaga lautele ma le tamāo'aiga i Samoa. O nisi ia o fa'atinoga e tau mai i le asō:

- Ua toe tatalaina le fa'aaogaina ole uafu i Satitua i lalo o se lisi fa'apaaga ma se pisinisi tumaoti Samoa mo le galueaina, ma ua toe maua ai avanoa faigaluega mo afioaga tuaoi, fa'apea le auaunaga e fa'aleleia ai vaa.
- O lo'o fa'aauau galuega ati'ina'e i le tatou malae vaalele faava-o-Malo i Faleolo, e aofia ai le fausiaina o le maota fa'apitoa mo malo fa'aalologia, fa'apea le fausiaina o le isi fale fa'atali pasese ma le paka mo vaalele laiti.
- Mo le silafia foi, o lea ua fa'agasolo le fausiaina ole Maketi i Savalalo, ma e fuafua e fa'amaea i le tausaga e 2025.
- O le a fa'amae'aina fo'i ia Iuni 2024 le toe fa'aleleia atoa o le Auala agai i Sisifo i le Malae Vaalele fa'ava-o-Malo.

#### **Lau Afioga i le Fofoga Fetalai,**

O nisi na o ati'ina'e tetele ua maea ma galuega o lo'o fa'agasolo, aua lava le ati'ina'eina o le soifua manuia lautele o si o tatou atunuu.

#### **Lau Afioga i le Fofoga Fetalai,**

O le a se i ou 'oto'oto atu le tulaga o lo'o i ai le tamaoiga i ona tulaga aoatetele;

- Na fa'amauina le si'itia malosi o le tatou tamaoiga, fa'atusa i le fuafuaga na i ai ina ua tatala tuaoi fa'ava-o-Malo ia Aokuso 2022, e aofia ai ma le si'itia maualuga o tagata tafafao maimoa mai fafo fa'apea aiga asiasi mai.
- E 10.2% na si'itia ai le tamaoiga i le 12 masina e tau mai ia Tesema 2023, faatusa i le 12 masina e tau mai ia Tesema 2022;
- E ui i le maualuga o le tau o le soifuaga (Inflation) sa fa'amauina ile 12.0% ia Iuni 2023, sa maitauina le tuutiitia ai o le tau o le soifuaga i le 5.9% ia Mati ole tausaga 2024. O lenei tuutiitiga ua mafua mai i le paū o tau o oloa mai fafo mai le 14.5% i le 5.1%, faapea foi le tuutiitia

o tau o oloa i totonu o le atunuu mai le 9.2% i le 6.0%, i le piriota e pei ona faailoa atu.

- O lo'o fa'atumauina pea le maualuga o a tatou tupe fa'aagaga po o tupe faasao i atunuu i fafo (Foreign Reserves), lea na fa'amauiina i le \$1.3 piliona tala ia Fepuari i le tausaga nei 2024, e tusa lea ma le 13.1 masina o oloa e mafai ona fa'atauina mai atunuu i fafo.
- O le tulaga i tagata tafafao maimoa mai fafo, o lo'o fa'atumauina pea le si'itia, lea na fa'amauiina ai le aofaiga e 121,521 tagata e tusa lea ma le 81.2% i totonu o le valu masina muamua o le Tausaga Fa'aletupe o lo'o fa'agasolo nei.
- E fa'apena foi i tupe fa'amomoli mai fafo, na siitia i le 2.2% po o le \$580.3 miliona tala i totonu ole valu masina ole Tausaga Fa'aletupe o lo'o faagasolo nei 2023/2024.
- O tulaga i aitalafu a le Malo, o lo'o fa'amauiina pea le fa'aitiitia, ma ua tusa nei ma le 30.6% o le tamaoaiga i le faaiuga o Tesema 2023. Ma ua atagia ai le si'itia pea o le tamaoaiga fa'apea le tu'uitiitia o le aofaiga o aitalafu i le \$865 miliona tala.

### **Lau Afioga i le Fofoga Fetalai,**

O le sologa lelei ole tamaoaiga e pei ona fa'amauiina mo le afa muamua o le tausaga faaletupe, ua mafai ona ausia ona o le galulue fa'atasi o nuu ma afioaga, pisinisi tuma'oti, ma le Malo mo le fa'atinoina o ati'ina'e aua le manuia lautele o Samoa.

## **II. VAAIGA TAULAI O LE TAMAOAIGA**

### **Lau Afioga i le Fofoga Fetalai aemaise le paia o lenei Palemene,**

O le vaaiga taula'i o le tamaoaiga o le lalolagi, e pei ona i ai le lipoti a le Faalapotopotoga mo Tulaga Tau Tupe a le Lalolagi (IMF), e 3.2% o lo'o i ai le si'itaga, ma o lo'o fuafua e fa'atumauina lea tulaga i tausaga o lumanai. O le a afua lea si'itaga ona o faiga faavae tautupe o atunuu tetele o le lalolagi, o le a a'afia ai le tau o le soifuaga i lona aotelega.

Ae mo Samoa lava ia, o lo'o tulimata'i le si'itia o le tamaoaiga e tusa ma le 6.6% mo le tausaga fa'aletupe o lo'o faagasolo nei, faatusa i le 5% lea na fuafua, ona o le si'itia malosi o le tamaoaiga i kuata o Setema ma Tesema o le tausaga e 2023. O lo'o fuafua e toe si'itia le tamaoaiga i le 5.8% i le tausaga fa'aletupe fou, fa'atusa i le 3.9% sa fuafuaina i le Fa'amatalaga o le Tala o le Tupe i le tausaga lenei o lo'o fa'agasolo.

O le tau o le soifuaga o lo'o mata'itu e ono fa'aitiitia i le 5% ia Iuni o le tausaga nei. Peitai, o lo'o i ai pea le fa'aeteetega i a'afiaga o lu'itau o lo'o tutupu i le

lalolagi i le taimi nei, e ono toe si'itia maualuga ai le tau o taumafa fa'apea le suauu e auina mai fafo.

O le a fa'auau pea le malosi o tupe fa'aagaga i atunuu i fafo i le \$1.5 piliona tala, e afua mai i tupe fa'ameaalofa mo ati'ina'e tetele a le Malo o lo'o fa'agasolo, aemaise ai fesoasoani mo tapenaga mo le Fono tele o Taitai o Malo o le Taupulega.

### **III. FA'AVAE O LE TALA O LE TUPE**

#### **Lau Afioga i le Fofoga Fetalai,**

O le Tala Fa'atautu o le Tupe 2024/2025 ua folasia i luma o le Maota i le taeao nei, sa fausia i luga o le fa'atupula'ia o le tatou tamaoaiga talu ona toe tatala tatou tuaoi fa'ava-o-Malo ia Aukuso 2022, o le fa'amuamua ale Malo mo faiga fa'avae e manuia ai tagatanuu, faatasi ai ma faiga faavae talafeagai mo le Tala o le Tupe.

#### **Lau Afioga i le Fofoga Fetalai,**

O le silasila a le tatou Malo i le tausaga fa'aletupe fou, o le a ave ai le fa'amamafa i le fa'atupula'ia o le tamaoaiga i auala gafataulimaina, ina ia mautinoa le mausali o le lumana'i manuia o le atunuu. O nei taumafaiga o le a fa'a'autū i faiga faavae po'o polokalame nei:

Taligāmalo o le Fonotele mo Taitai o Malo o le Taupulega ia Oketopa o le tausaga nei; fa'auauina o le Polokalame mo le Ati'ina'e o Itumalo; Si'itia o le Tomai o tagata faigaluga ma le Fetu'unaiga o totogi mo le tau o le Soifuaga, Si'itia Tulaga o Auunaga mo Galuga a le Malo, ma le fa'atinoina o Poloketi tetele i vaega maoti eseese.

I le fa'atinoina o nei faiga fa'avae i le tausaga fa'aletupe o lumanai nei, o le a fa'amalosia atili ai le fa'atupula'ia o le ati'ina'e gafataulimaina.

I lea la fa'avae o le Tala o le Tupe, ua talafeagai ai le Sini Autu; ***“Ia Fa'amausalī ma Fa'auau Ta'iala Gafataulimaina mo le Manuia Lautele.”***

#### **Lau Afioga i le Fofoga Fetalai,**

E tumau pea le popo'e i le ma'ale'ale ma le lamatia ai o le tatou tamaoaiga ona o lu'itau e ono tula'i mai i fe'ese'eseaiga o atunuu tetele o le lalolagi, aemaise ai o le fa'atupula'ia o fa'alavelave fa'alenua ma a'afiaga o suiga o le tau. O lesona mai le fa'amai sa a'afia ai le lalolagi atoa, ua manatu ai le Malo e ao lava ona ati'ina'e vaega uma o le tamaoaiga ina ia le fa'amoemoe tasi i se vaega ma'oti se tasi, e pei ona i ai a'afiaga i le vaega ma'oti o tagata tafafao maimoa mai fafo, ina ua tapunia tuaoi fa'ava-o-Malo. O le mafua'aga lea ua ave ai le fa'amamafa a le tatou Malo i ta'iala gafataulimaina, mo le fa'atupula'ia o le tamaoaiga ma tupe fa'aleoleo mo le tali atu i faalavelave faafuase'i i le lumana'i.

#### IV. TA'IALA O LE TALA O LE TUPE

##### **Lau Afioga i le Fofoga Fetalai ma Sui Usufono Mamalu,**

A'o fa'aauau ai le ati'ina'eina ma le fa'amausaliina o le fa'atupulaia o le tamaoaiga, o le aotelega o le Tala i le Tupe ua folasia i le Maota, o lo'o fa'amauina ai le fa'asiliga o tupe alu i lo'o tupe maua e tusa ma le 2.1% o le tamaoaiga mo le tausaga fa'aletupe o lo o lumanai nei, 2024/2025.

##### **Lau Afioga i le Fofoga Fetalai,**

O faiga faavae ma polokalame nei a le Malo ua faavasegaina i ni vaega se lima:

##### **1. Taligamalo mo le Fonotele o Taitai o Malo o le Taupulega**

O le tatou taligamalo mo lenei fonotele ia Oketopa o se avanoa le aumaua lea mo Samoa, ona o le tele o fa'amanuiaga mo le aufaipisinisi e ala mai i le siitia o tagata asiasi mai, ma o le a fesoasoani lea i le uuna'ia o le tamaoaiga. I le taimi nei, o lo'o fa'amuamua galuega tetele e pei o le fa'aleleia o fale, auala, ma auaunaga a le Malo, ina ia mautinoa ua tatou lava tapena. O le tausaga fa'aletupe fou o lo'o fa'atatauina ai le isi \$20.0 miliona tala aua taumafataga, apitaga i faletalimalo, nofoaga e faatino ai fonotaga fa'apea ma auaunaga tau i puipuiga, femalagaaiga, feso'otaiga ma le soifua maloloina.

O le sini autu o le Fonotele o lo'o fa'amuamua ai le galulue fa'atasi e fa'amausali taiala gafataulimaina mo le manuia lautele. O nei taiala e mautinoa ai o a tatou ati'ina'e o lo'o fa'atino e saofaga i le agai i luma o le tamaoaiga o le atunuu.

##### **2. Ati'ina'e o lo'o ave le Fa'amuamua i Tagatanuu**

A'o tatou aga'i atu i le tausaga lona tolu o le fa'atinoga o le Polokalame mo le Ati'ina'e o Itumalo, o lo'o sologa lelei pea le fa'amatu'uina atu o nei vaegatupe, aua polokalame o lo'o ave i ai le fa'amuamua a itumalo, e aofia ai sikolasipi mo a'oa'oga, ati'ina'e mo fa'atoaga ma lafumanu, ma polokalame fa'asoifua maloloina.

O lo'o ave pea le fa'amuamua a le Malo mo le fa'aleleia o feso'otaiga i uepaga tafa'ilagi mo aoga tulagalua, ma ua fa'atatauina ai le vaegatupe e \$880,000 i lalo o le Matagaluega o Aoga ma Aganuu.

O lo'o ave foi le fa'ataua a le Malo mo le toe fa'aleleia o le tatou falema'i tele, ma ua fa'aopoopo ai le vaegatupe \$1.0 miliona tala mo galuega fa'aleleia mo le tatou falemai tele i Motootua. Ua si'itia fo'i i le \$6.0 miliona tala le vaegatupe mo le Totogi mo Togafitiga i Atunuu i fafo.



E fa'aagaga fo'i le vaegatupe e \$2.5 miliona tala mo le ati'ina'eina o ta'aloga eseese i totonu o Samoa i lalo o le Matagaluega o Taaloga ma Alagaoa mo le fiafia o Tagata.

O lo'o fa'atumau foi le fesoasoani e \$3.0 miliona tala a le Malo i pisinisi laiti e tauala atu i le Ofisa Tutotonu mo Pisinisi, fa'atasi ai ma le isi \$3.0 miliona tala mo nonogatupe e māmā le tului i le Faletupe o Ati'ina'e a Samoa, ina ia mautinoa le lava tapena mo le Fonotele o Ta'ita'i o Malo o le Taupulega.

Ua si'itia ai le fesoasoani mo Fa'alapotopotoga Tumaoti i le \$2.0 miliona tala ina ia fa'aleleia atili ai auaunaga ma polokalame e fa'aa'upegaina ma si'itia ai avanoa a o tatou tagata limavaivai aua le soifua manuia lautele.

### **3. Si'itia o le Tomai o Tagata Faigaluega ma le Fetu'unaiga o Totogi mo le tau o le Soifuaga**

Mo le fa'aleleia atili o le tomai o tagata faigaluega a le Malo, e lua polokalame fou o le a fa'atinoina e fa'amalosia ai faiga fa'apaaga ma fa'alapotopotoga mo tomai eseese (professional bodies), faapea auala e si'itia ai le tomai o le afaigaluega.

E \$100,000 tala se vaegatupe ua faatatauina i lalo o le Tala a le Tupe a le Komisi o Tagata Faigaluega a le Malo, mo fa'alapotopotoga mo tomai eseese (e pei o le Asosi a le Au Tausi Tusi, Asosi o Loia, Asosi a Fomai ma Tausisoifua) ina ia fa'asoa ta'i \$10,000 i le asosi. O lea vaegatupe e lagolago ai i galuega mo le si'itia o le tomai o tagata faigaluega. O le ati'ina'eina o sui o nei asosi po'o fa'alapotopotoga mo tomai eseese, o le a to'atele ai tama fanau a Samoa e agavaa e tauofo mo galuega fa'akonesale i lalo o ati'ina'e tetele a le tatou Malo.

O le vaega lua, e \$200,000 tala ua fa'atatauina mo sikolasipi a e o lo'o faigaluega i le Malo i le taimi nei, ae o lo'o tau fa'amaea a latou a'oa'oga ma fa'ailoga muamua. E i ai aiaiga ma e fa'atauvā le filifiliina o i latou e agava'a i lalo o lenei polokalame.

O lo'o i ai fo'i le \$6.3 miliona tala mo le polokalame sikolasipi masani a le Malo, e fa'aauau ai a'oa'oga i le tatou atunuu, Fiti ma Niu Sila. E \$1.5 miliona tala se vaegatupe i lalo o le Matagaluega o Aoga ma Aganuu mo le polokalame e si'itia ai fa'ailoga o faiaoga. O nei faiga fa'avae o lo'o va'ava'alua ma fesoasoani fa'asikolasipi mai ia tatou Pa'aga mo le Ati'ina'e o si o tatou atunuu.

O le tausaga fa'aletupe fou o le a fa'atinoina ai le vaega mulimuli mo le toe fetu'unaiga o totogi aua le tali atu i a'afiaga o le tau o le soifuaga, ma o le a fesoasoani i le fa'atupulaia o le tamaoaiga. E 3% le si'itaga

mo Ofisa Sinia maualuga (Principal Officers) aga'i i isi tulaga i lalo ifo. E 2% o le a si'itia ai totogi o'i latou e i luga atu o Ofisa Sinia maualuga ae e i lalo ifo o le Ofisa Sili o Pulega, ma le 1% o le a si'itia ai totogi o Ofisa Sili o Pulega.

Sa fa'atino foi le iloiloga a le Komiti o Totogi a le Malo i le toe fetu'unaiga o totogi mo le Pulega, Palemene ma le Fa'amasinoga. I le maea ai o lenei iloiloga, ua fautuaina ai le toe fetu'unai o totogi ina ia talafeagai ma tulaga tofi, ma o le a fa'amamaluina i le aso 1 Iulai 2024. O le a fa'apea fo'i ona si'itia ai le Penisione mo le Palemene e pei ona fautuaina e le iloiloga tuto'atasi sa faia ia Iuni 2020.

#### **4. Si'itia le Tulaga o Auaunaga mo Galuega a le Malo**

E fiafia foi e fa'ailoa atu, ua maea nei le vaega lona lua o le iloiloga a le Ofisa o le Komisi o Tagata Faigaluega a le Malo, ma o lo'o atagia ai nisi o suiga tetele taua ua fa'amaonia e lo tatou Malo i totonu o le Tala o le Tupe 2024/2025.

O se tasi o manu lauti a le tatou Malo, ina ia mafai ona tuu faatasi uma fanua o le Malo i lalo o se fa'ava'a poo se Pulega se tasi, ma o lea o le a fa'atuina ai le Matagaluega o Eleele ma Fuagafanua. O lenei Matagaluega fou o le a fausia mai Vaega ma matafai oi patino i eleele ma fanua o lo'o i lalo o le Matagaluega o Si'osi'omaga ma Punaoa Fa'alenua. Ua i ai foi le fuafuaga o le a fa'asee atu i ai ma Vaega Patino i Fanua o le Esetete Tausi a Samoa (STEC), fa'apea le Fa'alapotopotoga o Fanua a Samoa (SLC) i le tausaga fa'aletupe 2025/26 pe a maea uma galuega mo le tapunia aloaia o nei Faalapotopotoga, lea o lo'o fa'atino nei e le Matagaluega mo Fa'alapotopotoga Tumaoti a le Malo.

O le Matagaluega o Ta'aloga ma Alagaoa mo le Fiafiaga o Tagata e lua i ai Matagaluega fou o le a amatalia aloaia ia Iulai 2024. O le Vaega mo Taaloga o le Matagaluega o Aoga ua faasee atu i lalo o lenei Matagaluega fou. Ua i ai foi le fuafuaga o le a fa'asee atu i ai ma le Pulega o Malae Taalo a le Malo pe a maea le galuega fa'asolo a le Matagaluega mo Faalapotopotoga Tumaoti a le tatou Malo.

E le gata i lea, o lo'o fa'asolo foi i le taimi nei iloiloga mo'omia o le Tulafono Tau Fa'aofi mo le fa'atuina o le Pulega mo Oloa Auina atu i fafo mo Samoa (Samoa Export Authority).

O nei suiga ua faia ina ia mavaevae, manino ma fa'amaoti lelei nei auaunaga eseese aua le si'itia o le fa'atinoga o galuega ma auaunaga a le tatou Malo.

## 5. Fa'atinoaina o Ati'ina'e Tetele

O le tausaga fa'alelupe fou o le a amatalia ai le fausiaina o le fale faamasino i Savaii, ma o le a si'itia ai le auaunaga mo faamasinoga i le motu tele. E \$17.0 miliona tala le tauaofa'i o lenei galuega ae \$5.0 miliona tala ua fa'atatauina mo lenei fa'amoemoe i le tausaga fa'alelupe 2024/2025. O le a faapea foi ona amatalia le poloketi o le Fa'atanoa Tele i Alaoa e tusa lona tau atoa ma le \$111.2 miliona tala Amerika. O le a tele ni faamanuiaga i vaega maoti o le suavai, malosiaga ma le si'osi'omaga mai i lenei ati'ina'e tele.

O le a amatalia fo'i le fausiaina o le auala kolosi simā mo Lano ma Afega e faatupeina i lalo o le Poloketi mo le Fausiaina o Auala e Tali atu ai i le Suiga o le Tau.

E le gata i lea, o le a faagasolo pea le faatinoga o isi poloketi fa'aauau e fa'atupe e a tatou Pa'aga mo le Ati'ina'e o si o tatou atunuu.

## V. **OTOOTOGA O LE TALA O LE TUPE**

### **Lau Afioga i le Fofoga Fetalai ma Sui Usufono Mamalu o lenei Palemene,**

O le a 'ou 'otoina atu loa vaega uma o le Tala Fa'atatau Autū o le Tupe mo le Tausaga Fa'alelupe 2024/2025:

<b><u>Tupe Maua</u></b>		<b>\$ 1,002,790,762</b>
Tupe Maua Masani	\$	805,982,250
Tupe e Faameaalofa mai Fafo	\$	196,808,512
<b><u>Tupe Faaalu</u></b>		<b>\$ 1,156,396,212</b>
Tupe Alu Faale-Tulafono	\$	158,278,019
Polokalame o Tupe Alu	\$	802,932,622
Tupe Faaalu Le Fuafuaina	\$	24,087,979
Tupe Faaalu mo Ati'ina'e	\$	171,097,592
<b><u>Fa'asiliga o Tupe Alu I Tupe Maua</u></b>		<b>-\$ 153,605,450</b>
Faatupeina mai		
Tupe Fesoasoani Tu'u Sa'o mo le Tala o le Tupe	\$	68,092,060
<b><u>Fesuaiga o Tinoitupe a le Malo</u></b>		<b>-\$ 85,513,390</b>

O le aotelega o le Tala ole Tupe mo le tausaga 2024/2025 e pei ona folasia i le Maota, o lo'o fa'amauina ai se fa'asiliga o tupe alu i tupe maua e \$153.6 miliona tala. A fa'avasega i lalo o le Auivi o Fa'amaumauga o Tupe a le Malo po'o le GFS e tusa lea ma le 2.1% o le tamaoaiga.

## VI. **FA'AVAE O TUPE MAUA**

### **Lau Afioga i le Fofoga Fetalai ma Sui Usufono Mamalu,**

E le'o i ai se fuafuaga a le Malo e si'itia pe fa'aopoopo ni lafoga mo le Tausaga faaletupe 2024/2025, ae o le a ave pea le fa'amamafa i le tausisia o le totogiina mai o lafoga pe a fua lea i le toe sologa lelei o le tamaoaiga.

O lo o fuafua e si'itia tupe maua i le 6 pasene, e afua mai lea si'itaga i le 15 pasene e si'itia ai tupe fa'ameaalofa mai fafo, po o le \$30.4 miliona tala. O le a si'itia foi tupe maua masani i le 4 pasene, e tusa lea ma le \$33.3 miliona tala.

O le aso 1 Iulai 2024, o le a amata fa'amamalu ai tupe aoina mai a tatou galuega fa'avaitaimi i Ausetalia ma Niu Sila, ma e tele le sao o totogi mo nei auaunaga i a tatou tupe maua e ese mai a tatou lafoga.

## **VII. GALUEGA FA'ATINO MA ATI'INA'E O LO'O AVE I AI LE FA'AMUAMUA**

### **Lau Afioga i le Fofoga Fetalai ma Sui Mamalu o le Palemene,**

O le aotelega o tupe fa'aalu mo le tausaga fa'aletupe 2024/2025 o lo'o fuafuaina ile \$1.16 piliona tala. O lenei aofaiga o lo'o aofia ai ma tupe fa'atatauina mo poloketi fa'atupeina mai Pa'aga mo Ati'ina'e masani a le Malo, ma o lo o atagia ai le si'itaga e 4 pasene pe a fa'atusa i le tausaga fa'aletupe o lo o faagasolo nei.

### **Lau Afioga i le Fofoga Fetalai,**

O le a ou 'oto'otoina atu loa vaegatupe ua fa'atatauina mo Matagaluega ma Fa'alapotopotoga ta'itasi mo le tausaga fa'aletupe 2024/2025:

- 1. Matagaluega o Faatoaga ma Faiga Faiva - \$20,434,017**
  - Galuega Faatino a Matagaluega - \$13,048,158
  - Galuega Faatino Tuuina atu i isi Vaega - \$5,269,426
    - E aofia ai ma le \$5,169,426 mo le **Faalapotopotoga o Suesuega Faasaienisi a Samoa**
    - \$100,000 mo le **Sosaiete mo le Puipuia o Manu**
  - Galuega e Avea ai ma Sui o le Malo - \$2,116,433
  
- 2. Matagaluega o Pisinisi, Alamanuia ma Leipa - \$20,787,951**
  - Galuega Faatino a Matagaluega - \$5,812,863
  - Galuega Faatino Tuuina atu i isi Vaega - \$13,272,575
    - E aofia ai ma le \$9,669,475 mo le **Pulega o Tagata Tafafao Maimoa mai Fafo**
    - \$350,000 mo le **Faalapotopotoga o Pisinisi Tūmaoti i Samoa**
    - \$350,000 mo le **Ofisa Tutotonu mo Pisinisi**
    - \$3,000,000 mo le fesosoani mo **Pisinisi Laiti** e tau ala atu i le **Ofisa Tutotonu mo Pisinisi**
  - Galuega e Avea ai ma Sui o le Malo - \$1,702,513

3. **Matagaluega o Fesootaiga ma Faamatalaga Faatekonolosi - \$10,432,093**
  - Galuega Faatino a Matagaluega - \$4,797,702
  - Galuega Faatino Tuuina atu i isi Vaega - \$2,657,513
    - Mo le **Ofisa o le Pule Faatonu**
  - Galuega e Avea ai ma Sui o le Malo - \$2,976,878
  
4. **Matagaluega o A'oa'oga ma Aganuu - \$135,466,017**
  - Galuega Faatino a Matagaluega - \$84,753,466
  - Galuega Faatino Tuuina atu i isi Vaega - \$42,724,455
    - E aofia ai le \$6,600,317 mo le Pulega o **Fa'ailoga ma Tusi Pasi Tauoloa o Samoa**
    - \$18,074,138 mo le **Iunivesite Aoa o Samoa**
    - \$18,000,000 le **Fesoasoani a le Malo mo Aoga**
    - \$50,000 mo le **Saofaiga Faatufugaga a Samoa**
  - Galuega e Avea ai ma Sui o le Malo - \$7,988,096
  
5. **Matagaluega o Taaloga ma Alagaoa mo le Fiafiaga o Tagata - \$8,218,889**
  - Galuega Faatino a Matagaluega - \$2,011,699
  - Galuega Faatino Tuuina atu i isi Vaega - \$3,288,304
    - Mo le **Pulega o Fale ma Malae taalo a Samoa**
  - Galuega e Avea ai ma Sui o le Malo - \$2,918,886
  
6. **Matagaluega o Tupe - \$117,790,778**
  - Galuega Faatino a Matagaluega - \$18,828,882
  - Galuega e Avea ai ma Sui o le Malo - \$98,961,896
    - E aofia ai le \$37,500,000 mo le Penisione a Tagata Matutua ma le Penefiti mo Tagata e i ai Manaoga Tumau o le Soifua o le a tuuina atu i le **Faalapotopotoga mo le Lumanai Manuia o Tagata Samoa**
    - \$3,000,000 mo Nonogatupe mama tului e fa'atinoina e le **Faletupe o Ati'ina'e a Samoa**
  
7. **Matagaluega o le Va-i-Fafo ma Fefa'atauaiga - \$30,191,493**
  - Galuega Faatino a Matagaluega - \$27,319,405
  - Galuega e Avea ai ma Sui o le Malo - \$2,872,088
  
8. **Matagaluega o le Soifua Maloloina - \$156,664,219**
  - Galuega Faatino a Matagaluega - \$117,042,449
  - Galuega Faatino Tuuina atu i isi Vaega - \$11,646,101
    - E aofia ai le \$10,996,101 mo le **Fa'alapotopotoga Faavae Tau Fatuga'o o Samoa**
    - \$200,000 mo le **Falema'i mo Faama'i le Pipisi**
    - \$100,000 mo le **Koluse Mumu**

- \$100,000 mo le **Sosaiete o le Kanesa i Samoa**
  - \$100,000 mo le **GOSHEN Trust**
  - \$100,000 mo le **METI**
  - \$50,000 mo le **Fa'alapotopotoga mo le Soifua Manuia o Aiga**
  - Galuega e Avea ai ma Sui o le Malo - \$27,975,670
- 9. Matagaluega o Faamasinoga ma le Faafoeina o Tulaga Tau Faamasinoga - \$22,632,720**
- Galuega Faatino a Matagaluega - \$15,032,653
  - Galuega e Avea ai ma Sui o le Malo - \$7,600,067
    - E aofia ai le **\$450,000** mo le **Fesoasoani mo auunaga Fa'aloia**
    - \$5,000,000 mo le **Fausiaina o le Fale Fa'amasino i Savaii**
- 10. Matagaluega o Punaoa Faalenatura ma le Siosiomaga - \$22,722,736**
- Galuega Faatino a Matagaluega - \$12,857,953
  - Galuega e Avea ai ma Sui o le Malo - \$9,864,783
    - E aofia ai le \$4,486,273 mo **Konekarate mo le Aoina o Lapisi**
- 11. Matagaluega o Eleele ma Fuagafanua - \$8,538,886**
- Galuega Faatino a Matagaluega - \$2,937,181
  - Galuega e Avea ai ma Sui o le Malo - \$5,601,705
- 12. Matagaluega o Leoleo, Falepuipui ma le Ola Toefuataina - \$58,333,194**
- Galuega Faatino a Matagaluega - \$38,722,738
  - Galuega Faatino Tuuina atu i isi Vaega - \$14,261,102
    - Mo le **Pulega o Galuega Tineimu ma Fa'alavelave Tutupu Fa'afuase'i i Samoa**
  - Galuega e Avea ai ma Sui o le Malo - \$5,349,354
- 13. Matagaluega a le Palemia ma le Kapeneta - \$11,008,147**
- Galuega Faatino a Matagaluega - \$7,995,943
  - Galuega e Avea ai ma Sui o le Malo - \$3,012,204
- 14. Matagaluega o Tiute ma Tupe Maua - \$14,436,486**
- Galuega Faatino a Matagaluega - \$11,210,841
  - Galuega e Avea ai ma Sui o le Malo - \$3,225,645
- 15. Matagaluega o Tina ma Tamaitai, Ati'inae o Nuu, Afioaga ma Agafeso'otai - \$65,665,347**
- Galuega Faatino a Matagaluega - \$11,856,500

- Galuega e Avea ai ma Sui o le Malo - \$53,808,847
    - E aofia ai ma le \$51,000,000 mo le **Poloketi mo Ati'ina'e o Itumalo**
16. **Matagaluega o Galuega, Fela'uaiga ma Ati'inae Esecese - \$50,762,039**
    - Galuega Faatino a Matagaluega - \$6,743,020
    - Galuega Faatino Tuuina atu i isi Vaega - \$43,238,426
      - E aofia ai le \$3,000,000 mo le **Pulega o le Suavai**
      - \$3,000,000 mo le **Faalapotopotoga o Malosiaga Tau Eletise**
      - \$5,050,000 mai i le **Iuni o Europa** mo le **Pulega o Suavai**
      - \$32,188,426 mo le **Pulega o Felauaiga i le Laueleele**
    - Galuega e Avea ai ma Sui o le Malo - \$780,593
  17. **Ofisa o le Loia Sili - \$5,642,267**
    - Galuega Fa'atino a le Ofisa - \$4,753,303
    - Galuega e Avea ai ma Sui o le Malo - \$888,964
  18. **Ofisa o le Su'etusi Sili - \$4,431,763**
    - Galuega Faatino a le Ofisa - \$3,759,872
    - Galuega e Avea ai ma Sui o le Malo - \$671,891
  19. **Ofisa o le Komesina o Faiga Palota - \$3,392,353**
    - Galuega Faatino a le Ofisa - \$2,825,540
    - Galuega e Avea ai ma Sui o le Malo - \$566,814
  20. **Ofisa o le Failautusi o le Fono Aoaofaitulafono - \$8,402,796**
    - Galuega Faatino a le Ofisa - \$7,136,497
    - Galuega e Avea ai ma Sui o le Malo - \$1,266,299
  21. **Komesina o Sulufaiga - \$1,727,923**
    - Galuega Faatino a le Ofisa - \$1,496,426
    - Galuega e Avea ai ma Sui o le Malo - \$231,497
  22. **Komisi o Tagata Faigaluega a le Malo - \$13,372,015**
    - Galuega Faatino a le Ofisa - \$5,212,236
    - Galuega e Avea ai ma Sui o le Malo - \$8,159,779
  23. **Ofisa o Fuainumera Faamauina - \$5,567,770**
    - Galuega Faatino a le Ofisa - \$4,639,044
    - Galuega e Avea ai ma Sui o le Malo - \$928,726

- 24. Komisi ole Toe Fuataiga o Tulafono - \$1,522,256**
- Galuega Faatino a le Ofisa - \$1,233,831
  - Galuega e Avea ai ma Sui o le Malo - \$288,425
- 25. Matagaluega mo Faalapotopotoga a le Malo - \$4,788,468**
- Galuega Faatino a Matagaluega – \$2,973,687
  - Galuega e Avea ai ma Sui o le Malo - \$1,814,781
    - E aofia ai le \$1,213,804 mo le **Faatuina o le Pulega mo Oloa Auina atu i Fafu a Samoa (Samoa Export Authority)**

## **VIII. TUPE LĒ FUAFUAINA**

### **Lau Afioga i le Fofoga Fetalai,**

O le vaegatupe lē Fuafuaina a le Malo mo le Tala o le Tupe 2024/2025 e \$24.1 miliona tala, e tusa lea ma le 3% o le aofaiga o Polokalame o Tupe Alu.

## **IX. TUPE ALU MO ATI'INA'E**

### **Lau Afioga i le Fofoga Fetalai,**

E \$171.1 miliona tala le aofaiga o tupe fa'ameaalofa o lo'o fuafua e tu'uina mai mo le fa'atinoga o ati'ina'e tetele a le Malo. O le si'itaga maualuga ua fa'amausali ai le lagolago a tatou Paaga mo Ati'ina'e aua le fa'atupeina o polokalame a Vaega Maoti o le tamaoaiga, aemaise i Vaega Maoti o Felauaiga ma Ati'ina'e Tetele, Fa'atoaga ma Faiga Faiva, Si'osi'omaga, Soifua Maloloina ma A'oaoga.

E le gata i lea, o le a fa'aauauina pea fesoasoani tu'usa'o mo Vaega Maoti tau i Soifua Maloloina, Suavai, Fa'atoaga ma Faigafaiva. Ua mafai fo'i ona fa'amautu se fesoasoani fa'aopoopo mo le Vaega Maoti o A'oaoga e atagia ai le naunautaga o le tatou Malo ina ia fa'aleleia tulaga i a'oa'oga mo le atunuu.

O Polokalame Fa'atino Sa'o mai e Paaga e tusa lea ma le \$108.3 miliona tala lona aofaiga, ma o le a fesoasoani i le fa'atinoina o nisi ati'ina'e taua a le tatou Malo faapea nuu ma alalafaga.

## **X. UPU FA'AI'U**

### **Lau Afioga i le Fofoga Fetalai,**

O le folasia ai o lenei Tala o le Tupe, ua fa'amausali ai pea le naunautaga a le Malo i faigapaaga lelei ma Nuu ma Alalafaga, Vaega Tumaoti fa'apea ana Paaga uma mo le Ati'inae o Samoa aua le fa'atinoina o ati'inae ua ave i ai le fa'amuumua mo le manuia lautele.

E ave ai lenei avanoa e fai ai a'u ma fofoga taumomoli o le tatou Malo e fa'afetaia ai le lagolagosua ma le agalelei mai o Atunu'u mai fafo ma Fa'alapotopotoga Fa'ava-o-Malo i le ati'ina'e o si o tatou atunuu o Samoa.



E fia fa'aleoina fo'i le agaga fa'afetai i le sao taua i le ati'ina'eina o le tamaoaiga, o le Vaega Tumaoti, Fa'alapotopotoga Tumaoti, le Pulega mamalu a Alii ma Faipule o nuu ma itumalo, le sao taua o nuu ma Ekalesia, aemaise tagatanuu uma o Samoa i Samoa nei ma so'o se tafa o le lalolagi o lo o afifio ma papaaao ai. O la le Fai Salamo o Tavita, "O le Atua o lo tatou malu ia ma lo tatou Malosi, e fai o Ia ma fesoasoani silisili i puapuaga, o le mea lea ou te le fefe ai pe a luluina le lalolagi ma luluina mauga i totonu o le sami, aua ua ia te i tatou le Alii o Au, o le Atua o Iakopo, o lo tatou Olo Mauaia ia.

### **Lau Afioga i le Fofoga Fetalai aemaise lenei Palemene Mamalu,**

E ia te a'u le ava tele e tatau ai, ou te tuuina atu ai le Tala Fa'atatau Autū o le Tupe 2024/2025 i le Palemene o Samoa ua potopoto mo lana fa'atofalaiga.

Ia saga faamalumu mai pea aao alofa o le tatou Tapaau Sili i luga o Samoa aemaise le aga atu o si o tatou atunuu i le fa'amanatuina o le 62 Tausaga o lona Malo Tutoatasi.

Ia manuia lau Afioga i le Fofoga o le Fono, manuia lenei Palemene, manuia le tapuaiga a Samoa le atunuu pele.

Soifua ma ia manuia.

*Na faaalua le agaga fiafia o le Maota i le patipati o latou aao i le maea ai o le Saunoaga a le Minisita o Tupe i le Tala Faatatau Autu o le Tupe 2024/2025.*

**FOFOGA FETALAI:** Ua faamalo faafetai saunoa i lau Afioga i le Minisita o Tupe mo lau Saunoaga Autu aua le tatou Tala Faatatau Autu o le Tupe 2024/2025. Faafetai tapena, malo foi mo le galuega maeaea lelei. O lea ua faafofoga le paia o le Maota i le faatofalaiga a lau Afioga, malo lava mo le galuega, e le faigofie. Matou te tatalo ia maua pea lou malosi i le tino ma le mafaufau faasilisili la le agaga aua le tautuaina o le tatou atunuu aemaise o le Palemene. Faafetai foi i le Matagaluega o Tupe mo le tapenaga o lenei Tala Faatatau Autu o Tupe 2024/2025. Faamanuia le Atua i tiute ma galuega o faafeagai.

E tusa ai ma Tulafono Tumau 133, o le tolopo felafolafoaiga i le Tulafono Tau Faaofi o le Faatatauina o Tupe 2024/2025 e le itiiti ifo i le 14 aso, a o tuuina atu le Tala Faatatau Autu o Tupe 2024/2025 mo le iloiloga a le Komiti o Tupe Maua ma Tupe Totogi ma toe lipoti mai ai i le Fono Aoa.

Ua tatou i ai i le taulaumea o galuega sa atofa mo lenei aso Fono, e momoli atu ai le faafetai i le paia o le Palemene ona o le faataua pea o le tatou valaauina. Ua tatou le faatasi ma le Taitai o le Malo le afioga i le Tamaitai Palemia ona o fonotaga faava o Malo o feagai ai. O nisi foi o sui usufono mamalu ua faao mai faanoi ona o le lē atoatoa o le malosi, aemaise o tuatuagia le maalofia o feagai ai. Ae faafetai faamalo le usufono i lenei aso.

E fia faaleo i le tatou Malo e ala i le tapenaga o le tatou Tala Autu o le Tupe ua faataatia nei i le Laulau a Fono. O lea ua saunoa le afioga i le Minisita o Tupe, faamalo fai o le faiva. O lo o tapuaia lava e le tatou Maota nei ma le atunuu la outou faatonufofua e ala i le tapenaga o le Tala Autu o Tupe ua

faataatia nei i le Laulau a Fono. O lea ua saunoa le Afioga i le Minisita o Tupe, faamalo fai o le faiva. O lo o tapuaia lava e le Maota nei ma le atunuu la outou faatonufofou e ala i le taitaiga o le tatou Malo i lenei vaiata. Onosai ma faamoemoe mea uma i le Atua e manuia fuafuaga uma o atinae mo se manuia o Samoa. Tatou talosia taualumaga o iloiloga a le Komiti o Tupe Maua ma Tupe Totogi, alofagia e le Atua masina o totoe o lenei tausaga faaletupe, aemaise foi o le tatou alo atu i le amataga o le tausaga faaletupe fou 2024/2025.

Faafetai Samoa i lau tapuaiga, ua manuia faiva o le Palemene i lenei aso ona o lau faanonogamanu, ia tumau pea manuia o le Atua i si o tatou atunuu.

Faafetai atu i Ofisa Sili o Pulega o Matagaluega ma Faalapotopotoga Tumaoti a le tatou Malo, malo tapuai i lenei aso. Ia faamanuia le Atua i lo outou valaauina. Tatou tatalo faatasi ina ia momoli atu e le Atua le soifua o si o tatou atunuu ma le tatou Maota nei i le faamanatuina o le tatou Malo Tutoatasi.

Ae tatou te le i tolopo, ou te talosaga atu i le sui usufono mamalu mo le Vaa o Fonoti, le Susuga i le Tiakono Toeaina e saunia se tatou tatalo faaii.

A o le i faia le tatou tatalo, ua talosaga mai nai faiaoga ma alo ma fanau a Salega 1 mo se avanoa mo le latou faamanuia i le Palemene. Ia, o le avanoa lenei a outou afioga i faiaoga ma le mamalu o le laumua.

***Na tolopo Taualumaga a le Fono Aoaofaaitulafono i le itula e 11:05 i le taeao seia aulia le Aso 18 Iuni 2024 i le itula e 9:30 i le taeao.***